

Na osnovu člana 74. Zakona o cestovnom prijevozu Federacije Bosne i Hercegovine ("Službene novine Federacije BiH", broj 28/06), federalni ministar prometa i komunikacija donosi

PRAVILNIK O JEDINSTVENOM INFORMACIONOM SISTEMU I OBRADI PODATAKA TEHNIČKIH PREGLEDA I REGISTRACIJE VOZILA

(Službene novine FBiH, broj 51/06)

Član 1.

Ovim Pravilnikom propisuju se uslovi za uvođenje elektronske obrade podataka koji se prikupljaju u toku tehničkih pregleda i registracije vozila i ostalih poslova koji se obavljaju u stanici za tehnički pregled vozila (u daljnjem tekstu: stanica), a u okviru funkcionisanja jedinstvenog sistema tehničkih pregleda i registracije vozila. Ovim Pravilnikom uređuju se i međusobna prava i obaveze Federalnog ministarstva prometa i komunikacija (u daljnjem tekstu: Ministarstvo), stručne institucije iz člana 76. Zakona o cestovnom prijevozu Federacije Bosne i Hercegovine (u daljnjem tekstu: Stručna institucija) i stanica u području jedinstvenog informacionog sistema i obrade podataka tehničkih pregleda i registracije vozila.

Član 2.

Ministarstvo putem Stručne institucije definiše, organizuje i uvodi jedinstveni informacioni sistem prikupljanja, distribucije, dostavljanja i korištenja podataka koji se u radu stanica obrađuju, sa svrhom bržeg, boljeg i efikasnijeg rada stanice, ujednačavanja kriterija, kontrole i podizanja nivoa kvaliteta tehničkih pregleda vozila.

Stanice su dužne tehnički i kadrovski se osposobiti tako da obezbijede nesmetano funkcionisanje informacionog sistema i pravilno i potpuno unošenje svih podataka o izvršenim tehničkim pregledima vozila.

Član 3.

U sistem distribucije, dostavljanja i korištenja podataka pored stanica, Stručne institucije i Ministarstva uključena su i Kantonalna ministarstva nadležna za poslove cestovnog prometa. U navedeni sistem mogu se djelimično ili u cijelosti uključivati i drugi zainteresovani organi i organizacije, institucije i ustanove, o čemu konačnu odluku donosi Ministarstvo.

Član 4.

Jedinstveni informacioni sistem u pravilu treba osigurati:

- trajno memorisanje svih u sistem unijetih podataka i njihovo ponovno korištenje u neograničenom broju slučajeva,
- ispisivanje (štampanje) unijetih, odnosno ranije memorisanih podataka u odgovarajuće rubrike svih u sistem unijetih podataka u svrhu analiza i distribucije podataka, izradu odgovarajućih izvještaja i njihovo objavljivanje u službenim ili stručnim publikacijama,
- mogućnost kontinuiranog (dnevnog, mjesečnog, po radnim mjestima i sl.) iskazivanja rada i obračuna materijalno-finansijskog poslovanja stanica i štampanje odgovarajućih izvještaja,
- mogućnost internog (po radnim mjestima unutar stanica) i eksternog (ostalih subjekata uključenih u jedinstveni informacioni sistem) povezivanja svih korisnika te mogućnosti prijenosa podataka,
- mogućnost unošenja dodatnih podataka i zahtjeva, uključivanja novih korisnika u jedinstveni informacioni sistem i sl.

Član 5.

Stručna institucija je, u okviru izvršenja obaveza i zadataka iz ovog Pravilnika, dužna osigurati obavljanje slijedećih poslova:

- organizovati izradu, usavršavanje i trajno praćenje primjenjivosti aplikacija, te njihovo instaliranje u stanicama i kod drugih priključenih korisnika,

- koordinirati odnose sa i između svih korisnika,
- preporučiti nabavku neophodne opreme (hardware) za funkcionisanje sistema, prijenos podataka i njegovo uključivanje u sistem ostalih korisnika,
- organizovati usavršavanje operativnog osoblja stanica za rad i korištenje jedinstvenog informacionog sistema,
- analizirati podatke dobivene iz jedinstvenog informacionog sistema, izrađivati izvještaje o utvrđenim rezultatima na osnovu statističke obrade podataka i objavljivati ih po potrebi.

Član 6.

Obaveze stanica u smislu funkcionisanja jedinstvenog informacionog sistema su slijedeće:

- za svoje potrebe nabaviti neophodnu opremu (hardware) sa odgovarajućim operativnim software-om, u skladu s preporukama iz člana 5. ovog Pravilnika,
- osigurati školovanje zaposlenih svoje stanice,
- stalno i kontinuirano unošenje podataka o radu stanice u jedinstveni informacioni sistem, a podatke o rezultatima izvršenih mjerenja automatskim preuzimanjem podataka sa mjerne opreme,
- osiguranje i redovno održavanje komunikacijske linije u svrhu neometanog funkcionisanja prijenosa podataka unutar jedinstvenog informacionog sistema,
- upućivanje zaposlenih koji operativno rade na informacionom sistemu na stručno usavršavanje koje organizuje Ministarstvo putem Stručne institucije.

Član 7.

Stručna institucija priprema, vrši obradu i prezentaciju podataka o izvršenim tehničkim pregledima vozila i dobijenim rezultatima ispitivanja tehničke ispravnosti vozila, utvrđuje način i uslove povezivanja i distribuiranja dobijenih podataka i analiza uz saglasnost Ministarstva.

Član 8.

Sredstva za finansiranje rada jedinstvenog informacionog sistema osiguravaju se iz dijela naknade za izvršeni tehnički pregled koji pripada Stručnoj instituciji.

Član 9.

Danom stupanja na snagu ovog Pravilnika prestaje primjena Pravilnika o jedinstvenom informacionom sistemu i obradi podataka tehničkih pregleda i registracije vozila ("Službene novine Federacije BiH", br. 49/02 i 16/04).

Član 10.

Ovaj Pravilnik stupa na snagu osmog dana od dana objavljivanja u "Službenim novinama Federacije BiH".

Broj 01/4-27-857-5/06
25. kolovoza 2006. godine
Mostar

Ministar
mr. **Nedžad Branković**, v. r.